



МОНГОЛ УЛСЫН
БАЙГАЛЬ ОРЧИН, АЯЛАЛ ЖУУЛЧЛАЛЫН
САЙДЫН ТУШААЛ

2020 оны 05 сарын 26 өдөр

Дугаар A402

Улаанбаатар хот

Г Журам батлах тухай Г

Монгол Улсын Засгийн газрын тухай хуулийн 24 дүгээр зүйлийн 2 дахь хэсэг, Монгол Улсын Яамны эрх зүйн байдлын тухай хуулийн 7 дугаар зүйлийн 7.1.6 дахь заалт, 19 дүгээр зүйлийн 19.1 дэх хэсэг, Байгаль орчныг хамгаалах тухай хуулийн 15 дугаар зүйлийн 1.2 дахь заалт, Ашигт малтмалын тухай хуулийн 56 дугаар зүйлийн 56.1.5, 56.1.8 дахь заалтыг тус тус үндэслэн ТУШААХ нь:

1. Аймаг, нийслэлийн Засаг дарга нараас Ашигт малтмалын тухай хуульд заасан Ашиг малтмалын тусгай зөвшөөрлийг цуцлуулах саналыг Байгаль орчин, аялал жуулчлалын яаманд ирүүлэхэд мөрдөх журмыг 1 дүгээр, Ашигт малтмалын тусгай зөвшөөрлийг цуцлуулах саналыг хэлэлцэж дүгнэлт гаргах журмыг 2 дугаар хавсралтаар тус тус баталсугай.

2. Тушаалын хэрэгжилтийг ханггуулж, хяналт тавьж ажиллахыг Хүрээлэн буй орчин, байгалийн нөөцийн удирдлагын газар /П.Цогтсайхан/-т даалгасугай.



Байгаль орчин, аялал жуулчлалын сайдын
2020 оны 05 дугаар сарын 26.-ны өдрийн
А/402 дугаар тушаалын нэгдүгээр хавсралт

**АШИГТ МАЛТМАЛЫН ТУХАЙ ХУУЛЬД ЗААСАН АШИГТ МАЛТМАЛЫН ТУСГАЙ
ЗӨВШӨӨРЛИЙГ ЦУЦЛУУЛАХ САНАЛЫГ БАЙГАЛЬ ОРЧИН, АЯЛАЛ ЖУУЛЧЛАЛЫН
ЯАМАНД ИРҮҮЛЭХЭД МӨРДӨХ ЖУРАМ**

Энэхүү журмыг аймаг, нийслэлийн Засаг дарга нараас Ашигт малтмалын тухай хуулийн 56 дугаар зүйлийн 56.1.5, 56.1.8-д заасны дагуу ашигт малтмалын тусгай зөвшөөрлийг цуцлуулах саналыг Байгаль орчин, аялал жуулчлалын яаманд ирүүлэхэд мөрдлөг болгоно.

Нэг.Байгаль орчин, аялал жуулчлалын яаманд санал ирүүлэх

Монгол Улсын яамны эрх зүйн байдлын тухай хуулийн 19 дүгээр зүйлийн 19.1.-д “...Яам нь сайдын эрхлэх асуудлын хүрээнд нутгийн захиргааны байгууллагатай аймаг, нийслэлийн Засаг даргаар дамжуулан харилцана. Нутгийн захиргааны байгууллага нь яамтай сайдаар дамжуулан харилцана...” гэж заасны дагуу сум, дүүргийн Засаг дарга, Иргэдийн төлөөлөгчдийн хурлын дарга нар ашигт малтмалын зөвшөөрлийг цуцлуулах саналаа Аймаг, нийслэлийн Засаг даргаар дамжуулж ирүүлнэ.

Хоёр.Саналын хамт ирүүлэх бүрдүүлбэр баримт бичиг

2.1. Тусгай зөвшөөрлийг цуцлуулах бодит нөхцөл байдлыг тогтоож, үндэслэл бүхий дараах бичиг баримтуудыг нотлох баримтын шаардлага хангуйж, аймгийн Засаг даргын санал бүхий албан бичгийн хамт ирүүлнэ. Үүнд:

2.1.1. Ашигт малтмалын тусгай зөвшөөрөл эзэмшигч байгууллагын хуулийн этгээдийн улсын бүртгэлийн гэрчилгээ, тусгай зөвшөөрлийн хуулбар хувь;

2.1.2. Тухайн тусгай зөвшөөрөл эзэмшигчийн Байгаль орчны менежментийн төлөвлөгөөний биелэлтийг дүгнэсэн аймаг, нийслэлийн ажлын хэсгийн жил бүрийн дүгнэлтийн хуулбар хувь;

2.1.3. Байгаль орчинд хортой нөлөөлж байгаль орчныг /хөрс, ус, агаар, ургамал, амьтан/ бохирдуулж, доройтуулсан бол эрх бүхий мэргэжлийн байгууллагаар байгаль орчинд учруулсан хохирлыг тооцуулж, холбогдох дүгнэлтийг гаргуулж, хэмжилт шинжилгээний дүн, фото зураг, агаарын ортофото зураг, дүрс бичлэгээр баримтжуулан тогтоосон байх;

2.1.4. Уул уурхайн олборлолтод өртсэн эвдэгдсэн талбайг батлагдсан уулын ажлын төлөвлөгөө, байгаль орчны менежментийн төлөвлөгөөнд заасны дагуу /техникийн болон биологийн/ нөхөн сэргээлт хийгээгүйг уулын ажлын дэвсгэр зураг, маркшейдерийн хэмжилтийн дүн, фото зураг, агаарын ортофото зураг, бичлэгээр баримтжуулж тухайн жил бүрийн уулын ажлын батлагдсан төлөвлөгөө, тайлан, байгаль орчны менежментийн төлөвлөгөө, биелэлтийн тайлангийн хамт ирүүлэх;

2.1.5. Хууль хяналтын эрх бүхий байгууллагаас тухайн тусгай зөвшөөрөл эзэмшигчийн үйл ажиллагаанд хийсэн хяналт шалгалтын холбогдох бичиг баримт, улсын байцаагчийн акт, албан шаардлага, дүгнэлт, шийдвэр, танилцуулга, авч хэрэгжүүлсэн бусад арга хэмжээний тухай нотлох баримт гэх мэт;

2.1.6. Засгийн газрын 2015 оны 120 дугаар тогтоолын 2 дугаар хавсралт 2.2.-т заасан тусгай зөвшөөрөл эзэмшигч нь Усны тухай хуулийн 22.2-т заасан усны сан бүхий газрын онцгой хамгаалалтын бусийн хилийн заагтай давхцалтай хэсэгт нөхөн сэргээлтээс

бусад үйл ажиллагаа явуулах, усны санг бохирдуулахыг хориглох заалтыг зөрчиж онцгой хамгаалалтын бүсэд олборлолтын үйл ажиллагаа явуулсан тохиолдолд;

2.1.7. Тусгай зөвшөөрлийг нь цуцлуулах санал бүхий албан бичиг, материалыг төрийн захиргааны байгууллагад хүргүүлж байгааг тусгай зөвшөөрөл эзэмшигчид мэдэгдсэн тухай тэмдэглэл бусад нотлох баримт;

2.1.8. Хууль ёсны эрх ашиг, сонирхол нь хөндөгдөж байгаа тусгай зөвшөөрөл эзэмшигчид Захиргааны ерөнхий хуульд заасны дагуу "Сонсох ажиллагаа"-г явуулсан хурлын тэмдэглэл, холбогдох баримт;

2.1.9. Тухайн сум, дүүрэг, баг, хороонд оршин сууж, амьдарч байгаа иргэдийн үндэслэл бүхий санал, хүсэлтийг сумын Засаг даргын албан бичиг болон Иргэдийн төлөөлөгчдийн хурлын тогтоол, иргэдийн гарын үсгээр баримтжуулсан байх;

2.1.10. Байгаль орчинд сөргөөр нөлөөлж байгааг тогтоосон бусад нотлох баримт бичиг, материал.

Гурав. Засаг даргын саналыг хүлээж авах, буцаах

Байгаль орчин, аялал жуулчлалын яаманд энэхүү журмын 2 дугаар зүйлд заасан холбогдох бичиг баримт, материалыг хавсаргасан аймаг, нийслэлийн Засаг даргын санал бүхий албан бичгийг ирүүлэхдээ нотлох баримтын шаардлага хангаагүй, хууль зүйн үндэслэлгүй, баримт бичгийн бүрдүүлбэрийг хангаагүй тохиолдолд БОАЖЯ-ны холбогдох ажлын хэсэг хүлээж авч шийдвэрлэхгүй бөгөөд тухайн саналыг аймаг, нийслэлийн Засаг даргад буцаан хүргүүлнэ.

Байгаль орчин, аялал жуулчлалын сайдын
2020 оны 05 дугаар сарын 26.-ны өдрийн
A/402 дугаар тушаалын хоёрдугаар хавсралт

АШИГТ МАЛТМАЛЫН ТУСГАЙ ЗӨВШӨӨРЛИЙГ ЦУЦЛУУЛАХ САНАЛЫГ ХЭЛЭЛЦЭЖ ДҮГНЭЛТ ГАРГАХ АЖЛЫН ХЭСГИЙН ЖУРАМ

Нэг. Нийтлэг үндэслэл

Энэхүү журмыг Ашигт малтмалын тухай хуулийн 56 дугаар зүйлийн 56.1.5, 56.1.8-д зааснаар Байгаль орчин, аялал жуулчлалын сайдын тушаалаар томилогдсон ажлын хэсэг аймаг, нийслэлийн Засаг дарга нараас ирүүлсэн ашигт малтмалын тусгай зөвшөөрлийг цуцлуулахаар ирүүлсэн саналын дагуу тусгай зөвшөөрлийг цуцлуулах, эсэх асуудлаар дүгнэлт гаргах харилцааг зохицуулна.

Хоёр. Ажлын хэсгийн зохион байгуулалт

2.1. Ажлын хэсэг нь үйл ажиллагаандаа Ашигт малтмалын тухай, Байгаль орчныг хамгаалах тухай, Байгаль орчинд нөлөөлөх байдлын үнэлгээний тухай хууль болон Монгол Улсын бусад хууль тогтоомж, энэхүү журмыг удирдлага болгоно.

2.2. Ажлын хэсгийн бүрэлдэхүүнийг сайдын тушаалаар байгуулах бөгөөд ажлын хэсгийн дарга, гишүүд, ажлын хэсгийн нарийн бичгийн дарга нараас бүрдсэн сондгой тооны бүрэлдэхүүнтэй байна.

2.3. Ажлын хэсгийн ахлагч нь Хүрээлэн буй орчин, байгалийн нөөцийн бодлогын асуудал хариуцсан газрын дарга байх бөгөөд гишүүдэд Хуулийн асуудал хариуцсан нэгжийн дарга, Байгаль орчны үнэлгээ аудитын нэгжийн дарга, Ой, ус, тусгай хамгаалалттай газрын кадастрын асуудал хариуцсан нэгжийн дарга болон уул уурхайн ашиглалтаас байгаль орчинд үзүүлэх сөрөг нөлөөлөл, орчны доройтлыг бууруулах бодлогын хэрэгжилт хариуцсан мэргэжилтэн, ойн болон усны бодлогын асуудал хариуцсан мэргэжилтэн тус тус байна.

2.4. Ажлын хэсгийн үйл ажиллагааны хэлбэр нь аймаг, нийслэлийн Засаг дарга нараас ирүүлсэн ашигт малтмалын тусгай зөвшөөрлийг цуцлуулах санал хүсэлт бүхий албан бичиг, түүний хавсралтаар ирүүлсэн нотлох баримтын шаардлага хангасан бүрдүүлбэр баримт бичиг, холбогдох материалыг судлан хэлэлцэх ажлын хэсгийн хурал байна.

Гурав. Ажлын хэсгийн эрх, үүрэг

3.1. Аймаг, нийслэлийн Засаг дарга нараас ирүүлсэн ашигт малтмалын тухай зөвшөөрлийг цуцлуулах санал хүсэлт, холбогдох бүрдүүлбэр баримт бичиг нь нотлох баримтын шаардлага хангаагүй, хууль зүйн үндэслэлгүй, байгаль орчинд хортой нөлөөлж байгаа, эсхүл нөхөн сэргээх, байгаль орчны менежментийн төлөвлөгөөнд заасан үүргээ биелүүлээгүй нь тогтоогдохгүй, нотлох баримт нь шаардлага хангахгүй бол ажлын хэсэг тухайн асуудлыг хэлэлцэж, тусгай зөвшөөрлийг цуцлуулах дүгнэлт гаргах боломжгүй байгааг дурдаж хариу албан бичгээр тухайн санал, хүсэлт, бүрдүүлбэр баримт бичгийг буцаан хүргүүлнэ.

3.2. Аймаг, нийслэлийн Засаг дарга нараас ирүүлсэн ашигт малтмалын тухай зөвшөөрлийг цуцлуулах санал хүсэлт, холбогдох бүрдүүлбэр баримт бичиг нь нотлох баримтын шаардлага хангасан, хууль зүйн үндэслэлтэй, байгаль орчинд хортой нөлөөлж байгаа, эсхүл нөхөн сэргээх, байгаль орчны менежментийн төлөвлөгөөнд заасан үүргээ биелүүлээгүй талаар эрх бүхий хууль хяналтын байгууллагын хяналт шалгалтаар тогтоогдсон, байгаль орчинд хортой нөлөөлж байгааг хэмжилт шинжилгээний дүнгээр

баталгаажуулсан нь нотлох баримтаар тогтоогдож байвал ажлын хэсэг тухайн асуудлыг хэлэлцэж, олонхын саналаар тусгай зөвшөөрлийг цуцлуулах дүгнэлтийг гаргаж, эцсийн шийдвэрийг Байгаль орчин, аялал жуулчлалын сайдын албан бичгээр Уул уурхай, хүнд үйлдвэрийн яам, Ашигт малтмал, газрын тосны газарт хүргүүлнэ.

3.3.Ажлын хэсэг нь шаардлагатай тохиолдолд тухайн тусгай зөвшөөрлийн талбайд газар дээр нь очиж ажиллах бөгөөд нутгийн захиргааны байгууллага, холбогдох эрх бүхий байгууллагаас нэмэлт материал, тайлбар, гаргуулан авч болно.

3.4. Ажлын хэсгийн нарийн бичгийн дарга нь хурлын тэмдэглэл хөтөлж, хурлын даргаар гарын үсэг зуруулсан байна.

Дөрөв. Ажлын хэсгийн хурлын дэг

4.1.Ажлын хэсгийн хуралд гишүүдийн олонх гишүүд оролцсон тохиолдолд хүчин төгөлдөр болно.

4.2.Ажлын хэсгийн хурлыг ажлын хэсгийн дарга удирдана. Ажлын хэсгийн дарга хурлын дэгийг сахиулж, хэлэлцэх асуудлын дарааллыг тогтооно.

4.3.Ажлын хэсгийн даргын шийдвэрээр хэлэлцэж буй асуудалтай холбоотой холбогдох асуудал хариуцсан мэргэжилтэн, тусгай зөвшөөрөл эзэмшигч аж ахуйн нэгж, байгууллагын төлөөллийг ажлын хэсгийн хуралд оролцуулж шаардлагатай мэдээлэл, тайлбар, лавлагааг гаргуулж болно.

4.4.Ажлын хэсгийн хурлын тов, хэлэлцэх асуудлын жагсаалтыг З хоногийн өмнө гаргаж, гишүүдэд хүргүүлнэ.

4.5.Ажлын хэсэг нь ашигт малтмалын тусгай зөвшөөрлийг цуцлуулах дүгнэлт гаргах болон бусад асуудлыг хуралд оролцсон гишүүдийн олонхийн саналаар шийднэ.

4.6.Ажлын хэсгийн гаргасан дүгнэлтэд ажлын хэсгийн дарга, гишүүд, нарийн бичгийн дарга гарын үсэг зурж баталгаажуулан нэгдсэн дугаар олгоно.

4.7.Ажлын хэсгийн гаргасан дүгнэлттэй зарчмын зөрүүтэй санал гаргасан гишүүд саналаа хурлын тэмдэглэлд тусгайлан тэмдэглүүлж болно.